

Na osnovu člana 31., stav 7. i člana 51. stav 3. Zakona o zaštiti prirode ("Službene novine Federacije BiH", broj 33/03), federalna ministrica okoliša i turizma donosi

PRAVILNIK

O SADRŽAJU I NAČINU IZRADE PLANA UPRAVLJANJA ZAŠTIĆENIM PODRUČJIMA

I. OPĆE ODREDBE

Član 1.

Ovim Pravilnikom uređuje se sadržaj i način izrade Plana upravljanja zaštićenim područjima.

Član 2.

Osnovni cilj Plana upravljanja je utvrđivanje uvjeta, rješenja, načina i postupaka za uspostavu dugoročnog sistema zaštite biološke raznolikosti, vrijednosti pejzaža i sistema upravljanja zaštićenim područjem na načelima održivog korištenja prirodnih, kulturnih i drugih dobara.

Član 3.

Upravljanje zaštićenim područjima provodi se na osnovu Plana upravljanja.

Član 4.

Pravne i fizičke osobe koje obavljaju djelatnosti u zaštićenom području dužne su se pridržavati Plana upravljanja.

II. IZRADA, DONOŠENJE I PROVOĐENJE PLANA UPRAVLJANJA

Član 5.

Za izradu i donošenje Plana upravljanja zaštićenim područjima u kategoriji zaštićenih prirodnih područja i nacionalnih parkova zaduženo je Federalno ministarstvo okoliša i turizma.

Za izradu i donošenje Plana upravljanja zaštićenim područjima u kategoriji spomenika prirode i zaštićenih pejzaža zadužena su kantonalna ministarstva nadležna za poslove okoliša.

Izradu Plana upravljanja iz stava 1. i stava 2. ovog člana nadležno kantonalno, odnosno federalno ministarstvo povjerava referentnoj stručnoj instituciji putem tendera.

Plan upravljanja zaštićenim područjem se donosi za period od 10 godina.

III. SADRŽAJ PLANA UPRAVLJANJA

Član 6.

Plan upravljanja iz člana 5. stav 4. ovog Pravilnika određuje razvojne smjernice, način izvođenja zaštite, korištenja i upravljanja zaštićenim područjem, te smjernice za zaštitu i očuvanje prirodnih vrijednosti zaštićenog područja uz uvažavanje potreba lokalnog stanovništva.

Član 7.

Plan upravljanja iz člana 5. stav 4. ovog Pravilnika sadrži:

1. ciljeve i politiku upravljanja zaštićenim područjem, sa dijelovima:

- svrha, funkcije i ciljevi zaštićenog područja,
- politika upravljanja zaštićenim područjem;

2. smjernice održivog upravljanja zaštićenim područjem, sa dijelovima:

- ocjena stanja zaštićenog i uticajnog područja,
- koncept zaštite cijelog područja i njegovih pojedinih dijelova (zona),
- načini praćenja stanja zaštićenog područja i njegovih vrijednosti,
- upravljanje pojedinim prirodnim i kulturnim vrijednostima, kao i resursima zaštićenog područja,
- razvoj i uvjete razvoja dopuštenih djelatnosti u pojedinim zonama,
- smjernice za izgled objekata u zaštićenom području,
- povezivanje zaštićenog područja sa susjednim područjima,
- uticaj na okoliš i društveno-gospodarski kompleks;

3. smjernice za realizaciju plana, sa dijelovima:

- razvoj plana upravljanja kroz aktivnosti po godinama,
- način i izvori finansiranja,
- troškovi realizacije plana,
- institucionalna struktura i nositelji aktivnosti u upravljanju zaštićenim područjem.

Član 8.

Ocjena stanja zaštićenog i uticajnog područja iz člana 7. tačka 2, alineja 1. ovog Pravilnika podrazumijeva valorizaciju prirodnih vrijednosti na osnovu kojih je proglašeno zaštićeno područje i elaboraciju stanja po pojedinim sektorima relevantnim za zaštićeno područje (šumarstvo, poljoprivreda, stočarstvo, ribarstvo, lovstvo, turizam, infrastruktura, socio-ekonomski status) datu od strane referentnih eksperata.

Član 9.

Nakon isteka razdoblja od pet godina analizira se provođenje godišnjih programa zaštite, očuvanja i korištenja zaštićenog područja, procjena ukupnih efekata Plana upravljanja zaštićenim područjem te se, po potrebi, obavlja revizija Plana upravljanja na način i u postupku kako je to propisano za njegovo donošenje.

Član 10.

Nakon isteka razdoblja od 10 godina analizira se realizacija Plana upravljanja zaštićenim područjem, kao i ostvareni rezultati te se obavlja revizija Plana upravljanja zaštićenim područjem na način i u postupku kako je to propisano za njegovo donošenje.

Član 11.

Ovaj Pravilnik stupa na snagu osam dana od dana objavljivanja u "Službenim novinama Federacije BiH".

Broj 04/02-23-1390/06
13. oktobra 2006. godine
Sarajevo

Ministrica
Katica Čerkez, s. r.